

Na osnovu člana 37 Statuta Islamske zajednice Bošnjaka u Švedskoj (u daljem tekstu IZBUŠ), Skupština IZBUŠ-a, održana dana 12.03.2022., donijela je

POSLOVNIK O RADU SKUPŠTINE ISLAMSKE ZAJEDNICE BOŠNJAKA U ŠVEDSKOJ

Član 1

Poslovnikom o radu Skupštine (u daljem tekstu: Poslovnik), regulira se rad Skupštine, odnosno sve ono što nije precizirano o njenom radu odredbama Statuta.

Član 2

Skupštinu saziva i vodi predsjednik Skupštine. Redovna Skupština se održava svake godine najkasnije do kraja mjeseca marta. Datum održavanja Skupštine Izvršni odbor objavljuje najmanje 3 mjeseca prije njenog održavanja.

Prijedlozi za dnevni red Skupštine sa obrazloženjem od zastupnika, džemata, komisija i tijela moraju biti pismeno dostavljeni Izvršnom odboru najkasnije 2 mjeseca prije održavanja. Anonimni prijedlozi neće biti razmatrani, a nepotpune prijedloge Izvršni odbor će vratiti na dopunu.

Član 3

Pismeni poziv i skupštinski materijal šalje se elektronskom poštom, najmanje 14 dana prije održavanja Skupštine.

Na Skupštinu se, pored zastupnika, pozivaju i članovi organa i tijela IZBUŠ-a. Skupštini mogu prisustvovati i pozvani gosti.

Član 4

Vanredna skupština se saziva shodno članu 25 Statuta, a datum njenog održavanja objavljuje se najmanje 2 sedmice prije održavanja. Poziv i materijali šalju se elektronskim putem najmanje 7 dana prije njenog održavanja.

Član 5

Za Skupštinu Izvršni odbor treba pripremiti pismene izvještaje o radu u proteklom periodu, kao i prijedloge plana rada i budžeta, te ostale informacije od IZBUŠ-a i Rijaseta, kao i druge prijedloge koji su blagovremeno pristigli.

Član 6

Utvrđivanje kvorama se obavlja na samom početku. Pristigli zastupnici će se registrirati, njihova imena će se javno pročitati i na taj način će se javno konstatirati da je skupštinsko tijelo formirano. Prilikom konstatacije će se uvesti u zapisnik ukupan broj skupštinskih zastupnika sa pravom glasa, vodeći računa o eventualnoj promjeni prava na broj zastupnika u toku mandata Skupštine. Zastupnici džemata, koji nemaju nijednog punopravnog člana, na Skupštini mogu prisustvovati, ali bez prava glasa, sve dok ne ispune uvjete propisane Statutom i Pravilnikom o jedinstvenoj članarini i vjerskim uslugama IZBUŠ-a.

Na prvoj sjednici Skupštine u novom mandatu, koja je ujedno i konstituirajuća, na prijedlog Izborne komisije izabrat će se predsjednik Skupštine.

Član 7

Skupštinu vodi predsjednik Skupštine, uz pomoć Radnog predsjedništva, u sastavu: aktuelni predsjednik i sekretar IZBUŠ-a, koji vodi zapisnik, te dva ovjerivača zapisnika, koji ujedno i broje glasove. U slučaju spriječenosti sekretara, IO IZBUŠ-a će odrediti osobu koja će voditi zapisnik.

Član 8

U zapisnik se unose samo usvojeni zaključci i odluke. Ovjerivači zapisnika imaju zadatku da pregledaju zapisnik i svojim potpisom ovjere vjerodostojnost zapisnika.

Član 9

Ovjereni zapisnik postaje zvaničan dokumenat nakon što ga potpiše predsjednik Skupštine. Isto se odnosi i na prijevod zapisnika na švedski jezik, za koji je zadužen sekretar IZBUŠ-a.

Član 10

Konstatiranje uslova za zasjedanje skupštine vrši predsjednik Skupštine na osnovu Statuta IZBUŠ-a, član 22.

U vanrednim situacijama Skupštinu je moguće održati online, odnosno elektronskim putem.

Član 11

Prilikom utvrđivanja dnevnog reda ne može se predlagati ništa što se ne nalazi u skupštinskom materijalu, odnosno, što Izvršnom odboru IZBUŠ-a nije dostavljeno najkasnije dva mjeseca prije održavanja Skupštine.

Član 12

Skupštinski zastupnici imaju pravo u toku rada Skupštine prijedlogom staviti na glasanje i smjenjivanje predsjednika Skupštine. Takav prijedlog potrebno je da zatraži najmanje jedna trećina zastupnika. Predsjednik je dužan da takav prijedlog stavi na glasanje.

Ukoliko taj prijedlog dobije podršku većine prisutnih zastupnika, njegovo mjesto će zauzeti sljedeći po broju dobijenih glasova prilikom izbora predsjednika na konstituirajućoj sjednici Skupštine. Ako, pak, spomenuti kandidat ne bude želio, ili je na neki drugi način spriječen da obavlja ovu funkciju, pristupit će se izboru novog predsjednika Skupštine.

Član 13

Prilikom diskusije svaki zastupnik u sklopu jedne tačke dnevnog reda ima pravo na jednu diskusiju od 3 minute i jednu minutu za odgovor na konkretno pitanje ili primjedbu koje su upućene njemu lično.

Predsjednik vodi računa o kvorumu Skupštine, kao i o visini koncentracije prilikom donošenja bitnih odluka.

Ukoliko se na Skupštini naruši red, predsjednik može izreći sljedeće mjere:

Upozorenje, oduzimanje riječi i udaljavanje sa Skupštine

Mjera upozorenja se izriče za ometanje reda, uzimanje riječi bez dozvole, upadanje u riječ govornika ili govora o pitanju koje nije predmet rasprave.

Mjera oduzimanja riječi se izriče kada je isto lice dva puta upozorenje. Također, mjera oduzimanja riječi se izriče i bez upozorenja pri upotrebi riječi kojima se vrijeda dostojanstvo prisutnih ili iznose podaci i ocjene iz privatnog života zastupnika i prisutnih na Skupštini.

Mjera udaljavanja sa Skupštine izriče se ako se ne poštuju prethodno izrečene mjere ili se na drugi način grubo krši red. Za izricanje ove mjere predsjednik Skupštine će zatražiti izjašnjavanje zastupnika o tome i, ukoliko većina zastupnika podrži ovu mjeru, osoba kojoj je izrečena mjera udaljavanja sa Skupštine, dužna je da se odmah udalji.

Ukoliko predsjednik, uz propisane mjere, ne može da osigura red na Skupštini, daje se pauza od 15 minuta.

Izrečene mjere oduzimanja riječi i udaljavanja sa Skupštine unose se u zapisnik.

Član 14

Odlučivanje glasanjem može biti glasanje o odluci jednostavnog karaktera ili glasanje o odluci složenog karaktera.

Član 15

Glasanje o odluci jednostavnog karaktera se koristi onda kada se Skupština treba izjasniti o određenom prijedlogu koji je jednostavnog "da ili ne" karaktera. Predsjednik će staviti prijedlog na glasanje:

1. Ko je za ponuđeni prijedlog?
2. Ko je protiv?
3. Ko je suzdržan od glasanja?

Da bi prijedlog bio usvojen potrebno je da prilikom glasanja dobije "običnu većinu", odnosno najmanje 50% + jedan glas "za" od ukupnog broja prisutnih zastupnika. Takva većina se naziva i "prosta većina".

Član 16

Glasanje o odluci složenog karaktera je glasanje koje se primjenjuje u situaciji kada postoji dva ili više različitih prijedloga po nekom pitanju o kojem Skupština treba donijeti odluku. Prilikom takvog glasanja, predsjednik će stavljati na glasanje po dva prijedloga za koje je najlogičnije da se glasa. Onaj prijedlog koji dobije više glasova ide u sljedeći krug glasanja protiv sljedećeg prijedloga za koji je najlogičnije glasati. Predsjedavajući će ovako staviti prijedloge na glasanje:

1. Ko je za prvi prijedlog?
2. Ko je za drugi prijedlog?

Nakon prebrojavanja glasova bit će utvrđeno koji prijedlog je dobio više glasova. Broj potrebnih glasova da neki prijedlog bude usvojen ovakvim načinom glasanja nije određen procentualnom formom, već je uslovjen jedino tim da treba dobiti "relativnu većinu", odnosno barem jedan glas više od drugog prijedloga. Prilikom ove vrste glasanja predsjednik

neće tražiti od skupa da se izjašnjava protiv prijedloga, niti će tražiti da se skup izjasni koliko glasača je bilo suzdržano. Ukoliko prijedlozi dobiju isti broj glasova i zbog toga bude nemoguće donijeti odluku, predsjednik će ponovo otvoriti raspravu po istom pitanju. U toku rasprave je moguće da se postigne konsenzus, da neki predlagač odustane od svog prijedloga ili da glasačko tijelo promijeni svoje stajalište. Ako je potrebno, nakon rasprave će prijedlozi opet biti stavljeni na glasanje kako bi se donijela potrebna odluka.

Prilikom biranja nekog člana organa prijedlozi sa imenima kandidata će biti stavljeni na glasanje po redoslijedu njihovog predlaganja:

1. Ko je za prvpredloženog kandidata?
2. Ko je za drugopredloženog kandidata?
3. Ko je za trećepredloženog kandidata? itd...

Onaj kandidat koji dobije "relativnu većinu" glasova je izabran za novog člana organa. Ako je u Statutu na određen način reguliran izbor nekog člana organa, onda se po toj odredbi treba i postupiti prilikom glasanja.

Ako se bira između više kandidata za više mjesta u organu, npr. 3 od 5, onda se uzimaju oni prijedlozi koji su dobili najviše glasova.

Član 17

Zastupnici prilikom svog izostanka na Skupštini nemaju pravo imenovati svog zamjenika za učešće na Skupštini.

Izuzetak od ovog pravila su imami koji su članovi IO IZBUŠ-a, a njihovi džemati nemaju više imama. U tom slučaju džematska skupština će izabrati nekog drugog zastupnika umjesto tog imama.

Član 18

Skupštinski zastupnici nemaju pravo napuštati zasjedanje Skupštine bez odobrenja predsjednika Skupštine. Predsjednik će, uz pomoć zapisničara, evidentirati zastupnike koji su napustili rad Skupštine i izvršiti potrebne korekcije u skupštinskom kvorumu.

U toku zasjedanja na mobilnim telefonima i zvuk i vibracija moraju biti isključeni.

Član 19

Skupštinski zastupnici koji napuštaju rad Skupštine nemaju pravo kuvertirati svoje glasove po određenim pitanjima koja se nalaze na dnevnom redu Skupštine.

Član 20

Pravo diskusije na Skupštini imaju samo skupštinski zastupnici i članovi organa IZBUŠ-a.

Član 21

Svaki skupštinski zastupnik, ukoliko smatra da je po nekom pitanju povrijeden ovaj Poslovnik, ima pravo zatražiti izjašnjavanje Skupštine o tome.

Tumačenje ovog Poslovnika daje Skupština na prijedlog Statutarne komisije.


Član 22

U periodu između sjednica Skupštine zastupnici mogu postavljati i diskutirati zastupnička pitanja putem internog foruma. Za rad internog foruma odgovoran je predsjednik Skupštine.

Ovaj Poslovnik o radu Skupštine Islamske zajednice Bošnjaka u Švedskoj usvojen je na Skupštini, 25. februara 2006. godine. Posljednji put je dopunjen 12. 03. 2022. i važeći je od narednog dana sve dok se ne izmijeni ili ne usvoji novi.

Predsjednik Skupštine:

Jönköping, 12. marta 2022.


Jasmin Fočo